

Dem Fwed Siengjmuengh Hawj Lwgnyez Diegbya

为山区孩子插上梦想的翅膀

——Geiq Gauhcanh Siujyoz Guh Hong Cuengh Gun Song Saw Vah Sonhag

□ **bojbaug gicej Vangz Siobyungz**

Aen sigij gonq betcib nienzdaih, Gveigangj Si Cindzangz Gih Mungzgungh Yangh Gauhcanh Siujyoz ndaej dingh guh Sawcuengh haeuj hagdangz sawqniemh diemj. Daj seizde gvaqdaej, Gauhcanh Siujyoz hopheux "aeu Cuengh guhcawj, Cuengh Gun giethab, aeu Cuengh coi Gun, Cuengh Gun cungj rox" "cibroek cih" sonhag fuengcim neix, gaenx guh hong Cuengh Gun song saw vah sonhag, sonhag cizlieng onjdwz daezsang, aeundaiej cingzcik maenhndei. 2009 nienz aeundaiej Cindzangz Gih 2008-2009 hagnienz siujyoz suciz gyauyuz sonhag cwnzgoj ngeih daengj ciengj; 2010 nienz, 2011 nienz, 2012 nienz lienzdaemh aeundaiej Cindzangz Gih siujyoz suciz gyauyuz cwnzgoj it daengj ciengj; 2011 nienz aeundaiej "Cindzangz Gih hong gyauyuz senhcin cizdij" cwnghauh; 2013 nienz aeundaiej Cindzangz Gih gyauyuz hidungj senhcin cizdij cwnghauh.

Byaij haeuj bakdou hung Gauhcanh Siujyoz, caenhraen aenlaeuz sonhag moqsup daengjdwz, ndaw hagdangz faex sang heuswd raemhrwd; lanzgiuzcangz, yindungcangz, daiz binghbanghgiuz, daizheiq, luengqroq vwnzva... yienghyiengh miz caez, hawj vunz roxnyinh gizneix ngamj doegsaw, doegsaw ndei. "Seizhaenx hagdangz mbouj miz ciengzgaengh, mbouj miz aendou hagdangz, cij miz aen laeuzsonhag 4 caengz ndeu, aenvih guh ndaej nanz lai gaenq youh gaeuq youh vaih lo; ndaw hagdangz gumz gumz gamxgamx, hwnj nywj hwnj rum nyasaengsaeng; cix mbouj miz gizdieg guh hozdung, yawj bae mbouj lumj aen hagdangz ndeu. Aenvih diuzgen yaez lai, haujlai lauxsae cungj siengj banhfap diuhdeuz, hagdangz gyauyuz sonhag cizlieng caemh mbouj ndei." Veiz Cinhlanz fuyaucangj dauqngex gij saeh haemzhoj dangnienz seiz, lwnh dwk lij lumj saeh ngoenzlwenz nei.

Gauhcanh Siujyoz haenqrengz guh ndei hong hagdangz gensez, vih aen hagdangz guh ndaej engq gyaeunde, hagdnagz lingjdauj lauxsae cungj mbaetraej dwk yungh ngaenz, dawj gij ngaenz banhgoeng de dingzlai cuengq haeuj hagdangz gensez bae; doengzseiz lij cien fueng bak geiq ceng, aeu baihwanz bangcoengh, dan cib lingz bi neix daej hagdangz couh roengzngaenz 70 lai fanh maenz guh gya, gvangq laeuzsonhag caeuq cingjcoih, caep ciengzgaengh, guh bakdou hung hagdangz, bu roen ndaem gorum gova daengj, hawj hagdangz gihcuj

sezsih gensez guh ndaej haemq ndei. 2012 nienz, Cindzangz Gih hainduj guh aen hanghmoeg ranz goenggya lauxsae coyouq neix, Gauhcanh Siujyoz caemh ndaej guh doengh laezyouq goenggya 3 caengz ndeu, dangqnaej gaenq guh ndei ndaej hawj lauxsae coyouq. "Hawj lauxsae youq ndaej onj louz ndaej roengzdaej caemhcaiq guh ndaej swnhsim, cij aeundaiej gyauyuz cwnzgoj maenhndei." Gyaudauj cujyin Cinz Cinhdonz lwnh naez gicej nyi.

Vih daezsang hagdangz gyauyuz sonhag cizlieng, Gauhcanh Siujyoz lij guh aen "gunhcwngz lauxsae mizmingz", bangcoengh lauxsae coz sug vaiq guh ndei. Hagdangz anbaiz lauxsae coz camgya gak cungj sonhag beizyin caeuq sonhag doxdax hozdung, sonyinx gyoengqde sij lunvwnz sonhag, guh goqdaez yenzgiu, seizneix daengx hagdangz miz 6 boux lauxsae baenz le daengx yangh sonhag guzgan lauxsae. Daj 2003 nienz gvaqdaej, Gauhcanh Siujyoz miz 10 bien lunvwnz lauxsae coz aeundaiej swcigih gaep ciengj, miz 32 bien ndaej si gaep ciengj; 2010 nienz, Cinz Cinhdonz, Cinz Caijsen song boux lauxsae camgya Daengx Gih Cuengh Gun Song Saw Vah Lauxsae Gangjgoq Doxidax doengzcaez aeundaiej it daengj ciengj.

2003 nienz 8 nyied, daengx guek mozfan lauxsae, daengx guek shwdwz senhcin goyinz, daengx guek "sam bet hungzgizsouj", Cunghoz Gungcanjdangj Daih Cibcaet Baez Daengx Guek Daiyauj Daihoih daiyauj Veiz Cinhlanz daj Gujsan Siujyoz ndaw yangh diuh daengz Gauhcanh Siujyoz dang fuyaucangj, caemh daiq gij sonhag leixniemh sonhag fuengfap ndei de daengz hagdangz. "Daj Veiz fuyaucangj daiq gij sonhag yenzgiu cwnzgoj 'gyagiengz Cuengh Gun giethab, cozvwnz daezgonq son sij' youq Gujsan Siujyoz romcomz ndaej neix daiq daengz hagdangz dou le, ginggvaq roengzrengz guh geij bi, gij sonhag cizlieng hagdangz dou ndaej daezsang haujlai." Cinz Caijsen lauxsae lwnh naez. "Doenggvaq hawj hagseng youq it ngeih nienzgaep sug Sawcuengh, doeg Sawcuengh, youh ciuq aen daegdiemj hagseng rox doeg rox sij Sawcuengh, daj it nienzgaep couh son hagseng sij cozvwnz Sawcuengh, daengz ngeih nienzgaep hagseng rox di Sawgun le, youh son hagseng dawz cozvwnz Sawcuengh hoiz baenz cozvwnz Sawgun, vih hagseng youq sam seiq nienzgaep rox sij cozvwnz Sawgun caep roengz giekdaj ndei,



▲ **Swcigih Gyauyuzdingh Minzgyaucu cucangj Veiz Lanzmingz (gvaz ngeih) daengz hagdangz guh diuyenz.**

hawj hagseng rox gij yinxdaeuz caeuq ndeicawq 'cozvwnz daezgonq hag sij' de." Veiz Cinhlanz gaisau naez gicej nyi.

Gauhcanh Siujyoz yawjnaek guh hozdung rogdangz, hawj gij naengzlig hagseng ndaej cienzmienh fazcanj. Hagdangz laeb miz doih diuqfoux, aencuj yinx meijsuz, doih Fwencuengh, aencuj langsjung seiswz daengj, gujli hagseng ciuj gij haenggyaez swhgeij camgya haeujbae, youq ndaw hozdung angqyangz majhung. 2009 nienz 5 nyied, hagdangz vwnzyidui daiyauj Mungzgungh Yangh camgya Cinz-dangz Gih cungh siuj hagseng vwnzyi veiyen aeundaiej it daengj ciengj; 2011 nienz 9 nyied, youq camgya Guengjsae cungh siuj hagseng gangj goj Sawcuengh doxdax ndawde, hagseng Couh Yenzzyen aeundaiej it daengj ciengj; 2011 nienz 11 nyied, hagdangz doih binghbanghgiuz camgya Mungzgungh Yangh cungh siuj hagseng binghbanghgiuz doxdax ndawde ndaej mingz daihdaeuz.

Gauhcanh Siujyoz guh Cuengh Gun song saw vah sonhag ngeihcib lai bi, guh ndaej haemzhoj, caemh guh ndaej sim' angq, nyeux gyaeuj yawjyawj gij vunqdin byaij gvaqdaej haenx, aen simmuengh "vih lwgnyez diegbya dem doiq fwed siengjmuengh ndeu" youq moix yamq roen de yap rongh, caemh lij yaek ciuq rongh diuzroen baenaj. "Dou miz saenqsim dawz hagdangz hwnjguh baenz aen hagdangz mizmingz hagseng haenggyaez, bohranz cuengqsim, lauxsae vuenyungz, sevei habhoz ndeu." Yaucangj Cinz Fuzbu doeklaeng gij miz saenqsim dwk doiq gicej naez.



▲ **Hagdangz dinghgeiz cujiz lauxsae guh gyauyenz hozdung, daezsang sonhag cizlieng.**



▲ **Youq aen hozdung yijvwnz gyauyenzcuj, gyaudauj cujyin Cinz Cinhdonz hwnj dangz goq yenzgiu 《Duzroeg Lau Gung》.**



▲ **Veiz Caijfangh lauxsae youq ban yozcenzbanh hwnj dangz goq "angq hag Sawcuengh".**